

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09) i člana 26. i 84. stav (1) Statuta Općine Stari Grad Sarajevo („Službene novine Kantona Sarajevo“, broj: 20/24), Općinsko vijeće Stari Grad Sarajevo na 38. redovnoj sjednici, održanoj dana _____2024. godine, donijelo je

(N a c r t)

P R A V I L N I K
O OSTVARIVANJU PRAVA NA JEDNOKRATNU NOVČANU POMOĆ
PORODICAMA ŠEHIDA I POGINULIH BORACA, RATNIM VOJNIM INVALIDIMA I
DEMOBILISANIM BORCIMA

I – OPĆE ODREDBE

Član 1.
(Predmet Pravilnika)

Pravilnikom o ostvarivanju prava na jednokratnu novčanu pomoć porodicama šehida i poginulih boraca, ratnim vojnim invalidima i demobilisanim borcima (u daljem tekstu: Pravilnik) utvrđuju se način i uslovi za ostvarivanje prava na jednokratnu novčanu pomoć, te postupak za ostvarivanje prava na jednokratnu novčanu pomoć.

II – KORISNICI PRAVA I FINANSIRANJE

Član 2.
(Ostvarivanje prava na jednokratnu novčanu pomoć)

(1) Pravo na jednokratnu novčanu pomoć mogu ostvariti:

- a) članovi porodica šehida i poginulih boraca,
- b) ratni vojni invalidi i
- c) demobilisani borci.

(2) Pravo po odredbama ovog Pravilnika, lica iz stava (1) ovog člana mogu ostvariti samo jednom u toku kalendarske godine, i to povodom obilježavanja Dana šehida ili povodom obilježavanja Dana Općine Stari Grad Sarajevo, o čemu odlučuje Općinski načelnik Općine Stari Grad Sarajevo.

Član 3.
(Uslovi za ostvarivanje prava)

(1) Lica iz člana 2. ovog Pravilnika, mogu ostvariti pravo na jednokratnu novčanu pomoć uz ispunjavanje sljedećih uslova:

- 1) da imaju prijavljeno prebivalište na području Općine Stari Grad Sarajevo;
- 2) da nisu ostvarili pravo na jednokratnu novčanu pomoć u prethodne 2 (dvije) godine.

(2) Pored uslova iz stava (1) ovog člana, lica iz člana 2. stav (1) tačka a) i b) ovog Pravilnika, moraju biti evidentirana u službenoj evidenciji koja se vodi u nadležnoj službi za boračko-invalidsku zaštitu Općine Stari Grad Sarajevo (u daljem tekstu: nadležna služba).

Član 4.
(Sredstva)

(1) Sredstva za dodjelu jednokratne novčane pomoći licima iz člana 2. ovog Pravilnika utvrđuju se u Budžetu Općine Stari Grad Sarajevo (u daljem tekstu: Budžet Općine) za svaku kalendarsku godinu.

(2) Raspodjela novčanih sredstava za ove namjene vršit će se u skladu sa raspoloživim sredstvima u Budžetu Općine za ove namjene.

Član 5.
(Postupak za ostvarivanje prava)

(1) Nadležna služba će putem boračkih udruženja i udruženja porodica šehida i poginulih boraca, pribaviti spiskove lica iz člana 2. stav (1) ovog Pravilnika.

(2) Udruženja iz stava (1) ovog člana i nadležna služba dužni su voditi računa o ispunjavanju uslova iz člana 3. ovog Pravilnika.

(3) Nadležna služba će izvršiti provjeru da li su lica iz člana 2. stav (1) ovog Pravilnika, ostvarila pravo na jednokratnu novčanu pomoć u prethodne 2 (dvije) godine.

(4) Po provedenom postupku, Općinski načelnik Općine Stari Grad Sarajevo će putem nadležne službe donijeti Zaključak o odobravanju sredstava za dodjelu jednokratne novčane pomoći.

III – OBAVEZE NADLEŽNE SLUŽBE

Član 6.
(Obaveze nadležne službe)

Nadležna služba za socijalnu zaštitu dužna je pratiti ostvarivanje prava na dodjelu jednokratne novčane pomoći porodicama šehida i poginulih boraca, ratim vojnim invalidima i demobilisanim borcima, na propisan način voditi evidenciju o ostvarivanju predmetnog prava, te pratiti usklađivanje Budžeta Općine sa potrebnim sredstvima za ostvarivanje prava.

IV – PRELAZNE I ZAVRŠNE ODREDBE

Član 7. (Stupanje na snagu)

(1) Ovaj Pravilnik stupa na snagu osmog dana od dana objave u „Službenim novinama Kantona Sarajevo”.

**PREDSJEDAVAJUĆI
OPĆINSKOG VIJEĆA STARI GRAD
SARAJEVO**

Seid Škaljić

Broj: 02-45-_____/24
Sarajevo, juni 2024. godine

O b r a z l o Ź e n j e

PRAVNI OSNOV

Pravni osnov za donošenje ovog Pravilnika sadržan je u uvodu istog. Članom 26. i 84. stav (1) Statuta Općine Stari Grad Sarajevo („Službene novine Kantona Sarajevo”, broj: 20/24) utvrđena je nadležnost Općinskog vijeća za donošenje općinskih propisa iz svoje nadležnosti.

RAZLOZI ZA DONOŠENJE

Dan šehida u Bosni i Hercegovini ustanovljen je odlukom Rijaseta Islamske zajednice u Bosni i Hercegovini, 23.01.1995. godine, a koji se obilježava drugog dana Ramazanskog bajrama. Dan šehida je dan sjećanja na one koji su dali živote braneći porodicu, čast, domovinu i vjeru, odnosno dan sjećanja na sve one koji su se svojim hrabrim podvizima i plemenitošću u odbrani Bosne i Hercegovine uzdigli do najsvetijih primjera boraca za pravdu, istinu i dostojanstvo.

Na sjednici Općinskog vijeća Stari Grad Sarajevo, održanoj 21.05.2001. godine, jednoglasno je usvojena Odluka da će se 02. maj ubuduće obilježavati kao Dan Općine Stari Grad Sarajevo. Tog datuma, 1992. godine odlučivalo se o sudbini Starog Grada i Sarajeva. Drugog maja su se vodile presudne bitke za odbranu Starog Grada, ali i Sarajeva: borba za kasarnu Druge armijske oblasti, presijecanje kolone motornih vozila u Dobrovoljačkoj ulici, odbrana zgrade Predsjedništva i oslobađanje predsjednika Predsjedništva BiH Alije Izetbegovića. Prvi put je 02. maj proslavljen kao Dan Općine Stari Grad Sarajevo 2002. godine. Od tog dana pa do danas Dan Općine Stari Grad obilježava se svečano, kroz različite kulturne, sportske, zabavne, te sadržaje posvećene boračkoj populaciji, kao i najmlađima.

Shodno naprijed navedenom, te cijeneći činjenicu da ovaj Pravilnik, između ostalog, predstavlja posvećenost Općine Stari Grad Sarajevo u očuvanju sjećanja na šehide i poginule borce, da Općina Stari Grad Sarajevo kao jedan od prioriternih ciljeva ima brigu o boračkoj populaciji, te da se ovim Pravilnikom uspostavlja transparentiji sistem dodjele budžetskih sredstava, to Općinski načelnik Općine Stari Grad Sarajevo predlaže Općinskom vijeću Stari Grad Sarajevo da usvoji ovaj Pravilnik.

FINANSIJSKA SREDSTVA

Za realizaciju prava iz ovog Pravilnika, potrebno je svake godine osigurati sredstva u Budžetu Općine Stari Grad Sarajevo.

STRUČNA OBRADA:

Služba za boračko-invalidsku
zaštitu i socijalna pitanja

PREDLAGAČ:

Općinski načelnik
putem Službe za za boračko-invalidsku
zaštitu i socijalna pitanja